

欽定天文正義卷七十三

客星占考

客星占考

漢武帝元光元年六月客星見於房占曰為兵起其
二年十一月單于將十萬騎入武州漢遣兵三十
餘萬以待之

昭帝元鳳四年九月客星在紫宮中斗樞極間占曰
為兵其五年六月發三輔郡國少年詣北軍

宣帝地節元年六月戊戌甲夜客星居左右角間東
南指長可二尺色白占曰有姦人在宮庭間其丙
寅又有客星見貫索東北南行至七月癸酉夜入

天市芒炎東南指其色白占曰有戮卿一曰有戮
王期皆一年遠二年是時楚王延壽謀逆自殺四
年霍氏謀反誅 黃龍元年二月客星居王梁東
北可九尺長丈餘西指出閣道間至紫宮

元帝初元元年四月客星大如瓜色青白在南斗第
二星東可四尺占曰為水饑其五月渤海水大溢
六月關東大饑民多餓死琅邪郡人相食 二年
五月客星見昴分居卷舌東可五尺青白色炎長
三寸占曰天下有妄言者其十二月鉅鹿都尉謝

君男詐為神人論死父免官

光武建武三十一年十月有客星焰二尺許西南行
至明年二月二十二日在輿鬼東北六尺所滅凡
見百一十三日輿鬼尸星主死亡客星居之為死
喪

孝明永平四年八月辛酉客星出梗河西北指貫索
七十日去梗河為胡兵至五年北匈奴七千騎入
五原雲中貫索貴人之牢其十二月陵鄉侯梁松
坐怨望誹謗下獄死 七年三月庚戌客星光氣

二尺所在太微左執法南端門外凡見七十五日
八年十二月戊子客星出東方 九年正月戊
申客星出牽牛長八尺歷建星至房南滅見至五
十日牽牛主吳越房心為宋後廣陵王荆楚王英
謀逆事覺自殺廣陵屬吳彭城古宋地 十三年
十一月客星出軒轅四十八日 十四年正月戊
子客星出昴六十日在軒轅右角稍滅昴主邊兵
後一年漢遣竇固耿秉等將兵擊匈奴一曰軒轅
右角為貴相昴為獄事時考楚事未竟司徒虞延

坐與楚王英交通自殺

孝章元和元年四月丁巳客星晨出東方在胃八度
長三尺歷閣道入紫宮留四十日滅

孝和永元十三年十一月乙丑軒轅第四星間有小
客星色青黃軒轅為後宮星出之為失勢 十六
年四月戊午客星出紫宮西行至昴五月滅昴為
趙

孝安永初元年八月戊申客星在東井孤星西南占
為大水是歲郡國四十一縣三百一十五雨水四

瀆溢傷稼壞城郭殺人民 二年六月甲子客星
大如李蒼白芒氣長二尺西南指上堦星指上階
為三公後太尉張敏免官 元初二年十一月甲
午客星見西方己亥在虛危南至胃昴 延光二
年十一月客星見天市占為貴人喪

孝順永建六年十二月壬申客星芒氣長二尺餘西
南指色蒼白在牽牛六度客星芒氣白為兵牽牛
為吳越後一年會稽海賊曾於等殺長吏拘奪吏
民揚州六郡逆賊章何等稱將軍犯四十九縣大

攻畧吏民 陽嘉元年閏月戊子客星白氣廣二
尺長五丈起天苑西南主馬牛為外軍色白為兵
是時敦煌太守徐白使疏勒王盤等兵二萬人入
于寘界虜掠斬首三百餘級烏桓校尉耿畢使烏
桓親漢都尉戎未瑰等出塞鈔鮮卑斬首獲生口
財物鮮卑怨恨鈔遼東代郡殺傷吏民是後西戎
北狄為寇害以馬牛起兵馬牛亦死傷於兵中至
十餘年乃息

孝靈熹平二年十月癸亥客星出南門中大如筵五

色喜怒稍小至後年六月消占曰為兵至六年司
隸校尉袁紹誅滅中官大將軍部曲吳匡攻殺車
騎將軍何苗死者數千人 光和五年六月丁卯
客星如三升碗出貫索西南行入天市至尾而消
占曰天市為貴人喪

魏文帝黃初三年九月甲辰客星見太微左掖門內
占曰客星出太微國有兵喪十月帝南征孫權是
後累有征役

明帝景初二年十月癸巳客星見危逆行在離宮北

騰蛇南甲辰犯宗星己酉滅占曰客星所出有兵
喪

高貴鄉公甘露四年十月丁丑客星見太微中轉東
南行歷軫宿積七日滅占曰客星出太微有兵喪
晉惠帝永興元年五月客星守畢

海西公太和四年二月客星見紫宮西垣至七月乃
滅

孝武太元十一年三月客星在南斗至六月乃沒占
曰有兵有赦是後司雍亮冀常有兵役十二年正

月大赦八月又大赦十八年二月客星在尾中
至九月乃滅占曰燕有兵喪二十年慕容垂息寶
伐魏為所破死者數萬人二十一年垂死國遂衰
亡

安帝元興元年十月有客星色白如粉絮在太微西
至十二月入太微占曰兵入天子庭

宋文帝元嘉十九年客星在北斗化為彗

陳廢帝光大二年六月壬子客星見氐東

周武帝保定元年九月丁巳客星見翼天和三年

七月己未客星見房心白如粉絮大如斗漸大東
行八月入天市長如匹所復東行犯河鼓右將癸
未犯艷瓜又入室犯離宮九月壬寅入奎稍小壬
戌至婁北一尺所滅凡六十九日占曰兵起若有
喪白衣會為饑旱國易政又曰兵犯外城大臣誅

建德三年二月戊午客星大如桃青白色出五
車東南三尺所漸東行稍長二尺所至四月壬辰
入文昌丁未入北斗魁中後出魁漸小凡見九十
三日占曰天下兵起車騎滿野人主有憂又曰天

下亂兵大起臣謀主其七月衛王直舉兵反討禽之十月始州民王鞅擁衆反討平之

唐文宗太和三年十月客星見於水位 開成二年

三月甲申客星出於東井下戊子客星別出於端門內近屏星四月丙午東井下客星沒五月癸酉端門內客星沒壬午客星如孛在南斗天籥旁

昭宗乾寧三年有客星三一大二小在虛危間乍合乍離相隨東行狀如闔經三日而二小星沒其大星後沒虛為齊分也 光化三年正月客星出於

中垣宦者旁大如桃光炎射宦者宦者不見 天復二年正月客星如桃在紫宮華蓋下漸行至御女丁卯有流星起文昌抵客星客星不動己巳客星在杠守之至明年猶不去占將相出兵

梁太祖乾化元年五月客星犯帝座

宋太祖建隆二年十二月己酉客星出天市垣宗人星東微有芒彗 三年十二月辛未西南行入氐宿二月癸丑至七星沒

太宗太平興國八年二月甲辰客星出太微垣端門

東近屏星北行占曰主弼臣失禮免 端拱二年
七月丁亥客星出北河星西北稍暗微有芒彗指
西南 淳化元年正月辛巳客星出軫宿逆行至
張十七日經四十度乃不見占云有土功又云有
使來

真宗景德二年八月甲辰客星出紫微天棹側字字
然如粉絮稍入垣內歷御女華蓋凡十一日沒占
曰后妃災 三年三月乙巳客星出東南方 大
中祥符四年正月丁丑客星見南斗魁前占曰有

赦令其年親祀汾陽后土大赦 天禧五年四月
丙辰客星出軒轅前星西北大如桃速行經軒轅
大星入太微垣掩右執法犯次將歷屏星西北凡
七十五日入濁沒占曰周維之分大臣憂
仁宗明道元年六月乙巳客星出東北方近濁有芒
彗至丁巳凡十三日而沒 至和元年五月己丑
客星出天關東南可數寸歲餘消沒

神宗熙寧二年六月丙辰客星出箕度中至七月丁
卯犯箕乃散主民饑大臣有見棄者或大水河溢

泛漲船平地 三年十一月丁未客星出天囷主
倉庫憂火災

哲宗元祐六年十一月辛亥客星出參度中犯掩廁
星主有暴兵米貴晉分兵災壬子犯九游星十二
月癸酉入奎至七年三月辛亥乃散主邊兵動

高宗紹興八年五月客星守婁魯分也 九年客星
守亢亢陳分也

孝宗淳熙八年六月己巳客星出奎宿犯傳舍占客
星亦妖星天之使禍見於天而無常所入列舍以

示休咎星大者事大而禍深色白其分有兵喪今
客星出紫微外座傳舍星客脩姦使邊夷侵境又
云出奎宿為兵姦臣偽惑天子於是金遣使來爭
執進書儀甲戌客星守傳舍五星九年正月癸
酉客星始不見自去年六月己巳至是凡一百八
十五日乃消伏

寧宗嘉泰三年六月乙卯東南方泛出一星在尾宿
青白色無芒彗條是客星如土星大占客星者天
之使者偶見於天而無常所入列宿以示休咎色

青憂疾白為兵喪兵革罷民饑死於是韓侂冑方
謀用兵 嘉定十七年六月己丑客星守犯尾宿

理宗嘉熙四年七月庚寅客星出尾宿

遼道宗咸雍元年八月丙申客星犯天廟

金世宗大定二十一年六月甲戌客星見於華蓋凡
百五十有六日滅

衛紹王大安二年二月客星入紫微中其光散如赤
龍之狀

元世祖至元十年三月癸酉客星青白如粉絮起畢

度五車北復自文昌貫斗杓歷梗河至左攝提凡
二十一日

仁宗延祐二年十月丙子朔客星見太微垣十一月
丙午客星變為彗犯紫微垣歷軫至壁十五宿明
年二月庚寅乃滅

明太祖洪武九年六月戊子有客星大如彈丸白色
止天倉經外屏卷舌入紫微垣掃文昌指內厨入
於張七月乙亥滅 十一年九月甲戌有客星見
於五車東北發芒文餘掃內階入紫微宮掃北極

五星犯東垣少宰入天市垣犯天市又掃天并西南行入尾至十月己未陰雲不見十八年九月戊寅有客星見太微垣犯右執法出端門乙酉入翼彗長丈餘丁亥在軫掃翼至十月庚寅犯軍門彗掃天廟

宣宗宣德五年八月庚寅有客星見南河旁如彈丸大色青黑凡二十有六日滅

景帝景泰三年十一月癸未客星見鬼宿積尸氣旁徐徐西行

英宗天順二年十一月癸卯有客星見於星宿色白西行至丙午其體微狀如粉絮在軒轅旁庚戌生芒五寸犯耀位西北星至十二月壬戌沒於東井五年六月壬辰天市垣宗正旁有星粉白至乙未化為白氣而消六年六月丙寅有客星見策星旁色蒼白入紫微垣犯天牢至癸未居中台下形漸微

憲宗成化四年九月己未有客星見星五度東北行癸亥色蒼白芒長三丈餘尾指西南變為彗星

孝宗弘治三年十二月丁巳有客星見天市垣色蒼
白東南行戊辰見天倉下漸向壁 七年十二月
丙寅有客星見天江旁徐行近斗至八年正月庚
戌入危 十年八月癸巳南京客星見天廐旁
十二年七月戊辰有客星見天市垣宗星旁入紫
微垣東藩經少宰尚書抵太子后宮出西藩少輔
旁至八月己丑滅 十五年十月戊辰有客星見
天廟旁自張抵翼復退至張戊寅滅
武宗正德十六年正月甲寅朔東南有星如火變白

長可六七尺橫亘東西復變駒屈狀良久乃散

世宗嘉靖十一年二月壬午有星見東南色蒼白有
芒積十九日沒 十三年五月丁卯朔有客星見
螣蛇歷天廐入閣道二十四日滅 十五年三月
戊午有客星見天棓旁東行歷天廚西入天漢至
四月壬辰沒 二十四年十一月壬午有星出天
棓入箕轉東北行逾月沒

神宗萬曆六年正月戊辰有大星如日出自西方衆
星皆西環 十二年六月己酉有星出房 三十

二年九月乙丑尾分有星如彈丸色赤黃見西南
方至十月而隱十二月辛酉轉出東南方仍尾分
明年二月漸暗八月丁卯始滅 三十七年有大
星見西南芒刺四射 四十六年十一月丙寅旦
有花白星見東方

熹宗天啓元年四月癸酉赤星見於東方

愍帝崇禎九年冬十月天狗見豫分 十七年五月
戊子朔天狗下尾白長竟天六月有大星出西方
芒燄閃爍搖不定